

# Nixrximirjil Sul

Nixrximir Yiluxlsaler Zzi Ddei Leil Perniar

**1** <sup>1</sup> Hajialixlyal ddei ssor Nixrximir ddei ddar mel jiasibbor vaexr dae: Yaldaxrxuxi Bosi goxrjia ddei zzirmar bei nrzei koxl hal koxl Zisiliuxr hal xiubbo gga, ngo Susa zzi gga zzirmar hher ggie hher dae. <sup>2</sup> Halcar, ngo ddei arzzi-nimar Hanaxrnixr ca nrnelsael dax cirgo a Yoxrdaxl mermi cirdae lei a. Ngo yaa leil, kebal mermi ssu mal si a, pato wo a gol dae seir Yoxrdaxl su ca mel nei Yiluxlsaler zzi ddei arsaesael nga dae biex. <sup>3</sup> Yaa ddarkoxl a bbeix: “Kebal mermi ssu mal si ca mel gga gol dae seir ca hal mel, Yoxrdaxl mermi hher dae a yarzisael goxr sol, ca mel lei yaa leil yarzisael bei vuxr-yixr; Yiluxlsaler zzi ddei weixrqiaxr mel lei caexr xiaxr gger a; zzi gielmi alddur lei cu pixl gger a,” eine bbeix a.

<sup>4</sup> Ngo ddar eilmel leil bbejjiur a dder cux ze i a nge, hormo ni nei cix a, merlabbor hher dae Arbosobo meixsaer qir leil almeixr lei nr zzor ddar biar a bbeix: <sup>5</sup> “Yihexrhuaxr merlabbor hher dae Arbosobo, vaer zzir nei yarzi i du ddo Arbosobo, ni, ni leil perniar nei ni miardal dae mel leil noni su ca mel dax ni bbeix har zaxr dae mel bei, yaa leil perniar. (Merlabbor hher dae Arbosobo Yihexrhuaxr...)

<sup>6</sup> Ni, ni ddei meixddur zze pu kae a i, nolba ddei zabbar-seilseir a ni leil visser su ddei merxixl-merni ni meixsaer qir leil, ni leil visser su Yirsaexllixl su ca mel leil biar gger dae mel leil noni la. Ngo ngua Yirsaexllixl su ca mel ni dax zuixl bei dae mel leil cexrssexl, ngo nei ngabbor hhexr lei zuixl bei a. <sup>7</sup> Ngua ni dax bei dae mel yarzi gexr-ddo, ngua ni, ni leil visser su Moxrxi leil miardal dae: arddolyox bei ddo arddolyox bei nr ddo mel dax, lixfaxr mel dax nei leiddur mel dax bei nr mae. <sup>8</sup> Ni leil qiuxr, ni, ni leil visser su Moxrxi leil miardal dae ddar mel leil holcir dae la, ni bbeix: ‘Nia ngo leil lar visser nr nga arddeirnga a, ngo dder nia leil cirgoxr-hanga gga bbe mal gger nia. <sup>9</sup> Nael nia ngo dax za xixl lei a, ngo miardal dae arddolyox bei

ddo arddolyox bei nr ddo mel leil noni a bei mae dae arddeirnga a, nia ca mel gga ggaxr teixl gger ca mel, yarzi vimir ggie hher dae bbeixarnar a, ngo halae halmaex gga yaa leil ae pex du lei a, yaa leil ngo tiur har dae a ngo ddei mi ddei leil bbeix zae gger ggie mermi ddei gga hier mal nia,' eine bbeix a. <sup>10</sup> Eilmel mel, ni leil visser su a; ni ddei cassor-worssor a; hherdder ni ni ddei wor vaervaer mel nei ni ddoddomo leixrhher bbor sser a jiuxl teixl lei mel nga a. <sup>11</sup> Ngo ddei seirpor, ni nolba ddei zabbar-seirseir a ni leil visser su ddei ni dax qiuxr dae mel leil noni la, ni mi ddei leil nolnger nei i du su ni leil visser su maelmaerjgia ni dax biar dae mel leil noni la. Ni leil qiuxr, ni leil visser su ddei leil eilni azo bei a lei bei cexr lol la, yar leil zzirmar meixsaer qir leil seir lol la," eine bbeix a.

Ngo mel zzirmar leil zzibbaer guaxr gger su bei dae.

### Nixrximir Yiluxlsaler Zzi Gga Jjixr

**2** <sup>1</sup> Yaldaxrxuxi zzirmar bei nrzei koxl hal koxl Nixrsar hal xiubbo gga, zzirmar meixsaer qir leil zzibbaer baer car, ngo zzibbaer ddei caer du lei a zzirmar leil gger. Ngo zzirmar meixsaer qir leil zeixleixr lei qiaxrmeix ddei leil i dae a yarzi cix eine zza nr goxr. <sup>2</sup> Yel zzirmar ddei ngo leil bbeix: "Ni no zzae nr no mel, arsaenga a qiaxrmeix ddei leil i dae a yarzi cix sael a bei dae leir? Eil ddei mel ni nixmox zzar cix dae a lar eine nga var," eine bbeix a. Yel ngo yarzi sael gexr. <sup>3</sup> Ngo zzirmar ddei leil bbeix: "Zzirmar, ni leil olga si lol nia! Ngo ddei porpor mel leil giexlhex ggie zzi ddei leil mel bei xiaxr gger ho a; zzi gielmi mel ddei alddur mel lei cu pixl gger ho a; ngo arsaе qiaxrmeix ddei leil nr cix dae bei teixl lei xie bbeixleir?" <sup>4</sup> Giedae zzirmar ddei ngo leil bbeix: "Ni azo qiuxr?" Yel ngo dder merlabbor hher dae Arbosobo dax ddar biar. <sup>5</sup> Ngo zzirmar ddei leil bbeix: "Zzirmar, ni zzirdae a seir, halae ngo ni meixsaer qir leil ni leil ggese lol arddeirnga a, ni leil qiuxr, ngo leil miardal a Yoxrdaxl mermi ssi lol a, ngo ddei porpor mel leil giexlhex ggie zzi ddei zi box jjixr lol la," eine bbeix a. <sup>6</sup> Halcar, zzirmar maerssor ddei zzirmar dax cux dax dae. Zzirmar ddei ngo leil biex a bbeix: "Ni ssi arddeirnga a hormo ni sael nga nia? Arddolcar jjixr lei?" Ngo dder nixixl

ddei dixl zei lei a. Yel zzirmar ddei dder ngo leil ssi lol ggese. <sup>7</sup> Ngo yoxl zzirmar ddei leil bbeix: “ Zzirmar, ni ggese arddeirnga a, ni leil qiuxr, ngo leil ni miardal dae mel vaexr deix dae sul ddei gger la a, Hexrxi ser ddei serzar leil bbeix gger a ngo leil gger lol a, Yoxrdaxl mermi ssi ci lol. <sup>8</sup> Yoxl miardal zei lei mel sul leil vaexr zei lei a, zzirmar ddei sixzwei cili leil guaxr gger su Yalsaxl leil bbeix gger a, yar leil ngo leil sixlox gger lol a, Arbosobo ddei xi dax meixr hher ggie taxr ddei alddur mexrfa nei zzi weixrqiaxr, halae ngo hher ggie xi mel bei, ” eine bbeix. Ngo ddei Arbosobo ngo leil seirseir meixl gger a ngo leil beijjiu a, zzirmar ddei ngo qiuxr dae mel leil ddarkoxl a.

<sup>9</sup> Zzirmar ddei meixr guaxr su vaervaerpor mel leil nei mur zzaer su meixr mel leil miardal a ngo leil ho xixl lol. Ngo Hexrxi ser ddei serzar dax halmaex ssi ci a, zzirmar miardal dae mel vaexr deix dae sul ddei yaa leil jia gger a. <sup>10</sup> Hexrluixr su ca Sebala nei Yalmae su ca ddei vaervaerpor Dobiryar mel, Yirsaexllixl su ca mel leil seirggiebbær qiuxr gger lei su ca zza bbejjiur a dder yarzisael seifu faex.

<sup>11</sup> Ngo Yiluxlsaler zzi gga ssi ci a, halmaex gga so ni hher a. <sup>12</sup> Ngo eilmerxixl ha du lei a, ca nrnelsael a lei cirter a ha du lei a; nael Arbosobo ngo nixmoxzzar xiar wo lol Yiluxlsaler zzi ddei leil bei gger labox miar mel, ngo cir ddei leil lei bbeix nr gger. Ngo zzaer dae zzeir ddei leil cuxrteixl a, kebal zzeir mel ngo dax halmaex hher nr dax dae. <sup>13</sup> Hal cir xixlmei, ngo lagiex alddur peixl gga ddux a, anol yir lurddur bbe dax ssi mal a, cirbelde dol ggie alddur peixl dax ssi ci a. Ngo Yiluxlsaler zzi ddei weixrqiaxr mel leil i a, weixrqiaxr mel caexr pixl gger ho a; zzi gielmi alddur peixl leil adoxl cu pixl gger ho a mia a. <sup>14</sup> Ngo yoxl xilmeir ssi mal a, lur zer ggie gielmi dax nei zzirmar ddei ajjix bbeddur dax ssi ci a; nael ngo zzaer dae zzeir ddei gger ggie nr zza. <sup>15</sup> Yel eilmerxixl ngo laxiur zex caca ssi deix a, zzi weixrqiaxr ddei leil i ssi, yoxl za xixl lei a lagiex alddur peixl gga ddir a dder jjixr lei a. <sup>16</sup> Ngo arddolmaex ssi, ngo arddolyox bei, vaervaerpor mel nr saexl. Ngo halae Yoxrdaxl su ca mel leil, Arbosobo leil zi su ca mel leil, cabessor mel leil, vaervaerpor mel leil nei miar bei su kebal ca mel leil bbeix nr gger seir.

<sup>17</sup> Giedae ngo yaa leil bbeix: “Nia lei niul goxrsol-goxrnaxr goxr dae mel leil mia a: hherdder Yiluxlsaler zzi ddei leil arsae bei xiaxr gger, zzi gielmi alddur ddei leil adoxl cu pixl gger eilmel nga a. Lei, niul Yiluxlsaler zzi ddei weixrqiaxr ddei zi box lei, nrnga a niul leil zeixleixr bei vuxryixr leilei.” <sup>18</sup> Ngo, ngo ddei Arbosobo arsae ngo leil seirseir meixl gger a ngo leil beijjiu, halae zzirmar ddei ngo dax bbeix dae ddar mel yaa leil bbeix gger a. Yaa dder bbeix: “Niul ha du lei a zi box lei!” eine bbeix a. Yel yaa dder miar seirseir eil ddei bei dae a. <sup>19</sup> Nael Hexrluixr su ca Sebala, halae Yalmae su ca mel ddei vaervaerpor Dobiryar nei Alaboxr su ca Zisaxl bbejjiur a dder ngua leil vaessi, ngua leil i ze i a bbeix: “Nia azo bei suax leir? Zzirmar ddei leil dir a ngo?” <sup>20</sup> Ngo yaa leil ddarkoxl a bbeix: “Merlabbor hher dae Arbosobo ddei ngua leil cirza-hanga lei bei cexr lol. Ngua yar leil visser su bei su ca mel, ha du lei a zi nia; nia zzael Yiluxlsaler zzi ddei gga azo li wo nr ddo, guaxr quexrlixl nr zza, nia eilmaex su nr nga a, nia leil holcir su ca nr zza.”

### Yiluxlsaler Zzi Ddei Weixrqiaxr Zi Box

**3** <sup>1</sup> Halcar, Arbosobo leil zi su vaer zzir Yirlixlyalsixr nei yar dax cirgo a Arbosobo leil zi su arzzi-nimar mel ha du lei a Ya gielmi ddei bei. Yaa alddur peixl mel hha a dder, kebal hal mel dax bbe teixl lei a. Yaa yoxl zzi weixrqiaxr ddei bei box a Hamiryal taxr dax nei Hanaxryal taxr dax zzeze ci, weixrqiaxr mel leil kebal hal mel dax bbe teixl lei. <sup>2</sup> Jiasi zixl nael Yilixlge su ca mel zi box. Jiasi zixl nael Yilixl ddei ssor Sarkexl zi box.

<sup>3</sup> Haxinaxr giedae ca mel Ngol gielmi ddei bei, alddur mexrfa bei, alddur peixl hha, alddur lagexddu nei xiugexddu bei. <sup>4</sup> Jiasi zixl nael Hagesi ddei lilbol, Vulixlyal ddei ssor Mirlixlmoxl zi box. Jiasi zixl nael Mirsixlsaxlbiexr ddei lilbol, Birlixljia ddei ssor Mirsulaxr zi box. Jiasi zixl nael Banaxr ddei ssor Sardu zi box. <sup>5</sup> Jiasi zixl nael Tixrgeyal su ca mel zi box. Nael zzi gga su vaervaerpor miar guaxr su ca mel yaa leil bei lol miar mel nr bei.

<sup>6</sup> Baxiyal ddei ssor Yihexryidaxl nei Birsordaexl ddei ssor Mirsulaxr Yisanaxr alddur peixl bei box, alddur mexrfa bei, alddur peixl

hha, alddur lagexddu nei xiugexddu bei. <sup>7</sup> Jiasi zixl nael Zibixl su ca Mirlatixr, Mirluixr su ca Yarduixl nei Zibixl su ca, halae Hexrxi ser ddei serzar guaxr dae Mirsiba su ca mel zi box. <sup>8</sup> Jiasi zixl nael piu ddaexr su Hahaeryar ddei ssor Wuxue zi box. Jiasi zixl nael hexzzi bei su Hanaxrnixryar zi box. Ca eimel Yiluxlsaler weixrqiaxr ddei zi box a, kuaxkuax ae weixrqiaxr ddei dax zzeze ci. <sup>9</sup> Jiasi zixl nael Yiluxlsaler ddei cir peix leil guaxr su, Huxl'aer ddei ssor Lixlfaxryar zi box. <sup>10</sup> Jiasi zixl nael Haluxlmoxl ddei ssor Yidaxlyar yar ddei xi deixrgoxr hal zixl zi box. Jiasi zixl nael Hasanixr ddei ssor Hatu zi box. <sup>11</sup> Halixr ddei ssor Marziyar nei Bahamoxrya ddei ssor Hasuxl ar zixl zi box, halae Luxr taxr<sup>a</sup> ddei zi box. <sup>12</sup> Jiasi zixl nael Yiluxlsaler kebal hal peix leil guaxr su, Haloxrhie ddei ssor Sarloxr nei yar ddei ssormaer mel zi box.

<sup>13</sup> Hanexl nei Sarnoxryal zzi gga goxr dae ca mel Lagiex gielmi bei box, alddur peixl hha box, alddur lagexddu nei xiugexddu bei box, yoxl zzi ddei weixrqiaxr lixiu licei (440) gocixr zi box, Cirbelde gielmi dax zzeze ci.

<sup>14</sup> Boxrhazilixr mermi leil guaxr su, Lixljiaxr ddei ssor Marziyar Cirbelde gielmi ddei bei box, alddur mexrfa bei, alddurpeixl hha, halae alddur lagexddu nei xiugexddu bei.

<sup>15</sup> Mirsiba mermi leil guaxr su, Gexlhexrxi ddei ssor Saluixr lur zer ggie gielmi ddei bei, alddur mexrfa bei, alddur peixl hha, alddur lagexddu nei xiugexddu bei. Yar yoxl zzirmar culugga dax naer dae Xiloxryal ajjix bbe ddei weixrqiaxr ggu xixl, Daxlweixl zzi ddei dax halmaex zei lei dae teixrzi mel dax zzeze ci. <sup>16</sup> Jiasi zixl nael Boxrsuxl mermi ddei cir peix leil guaxr su Yapur ddei ssor Nixrximir zi box, Daxlweixl ddei lixrbbax deixrgoxr dax zzeze ci, yoxl giexl teixl lei lurddur bbe dax nei zzi deil sexrsexr su ca mel ddei xi mel dax zzeze ci.

---

<sup>a</sup>3:11 Luxr taxr Taxr eil ddei gga mel aba nei azo lei kal cexr; olbbexr nei azo lei cu cexr.

## Zzi Weixrqiaxr Zisu Lixlweixl Su Ca Mel

<sup>17</sup> Jiasi zixl nael Lixlweixl su ca Banixr ddei ssor Lixlhoxr zi box. Jiasi zixl nael Ziyila mermi ddei cir peix leil guaxr su Lixlweixl su ca Hasabiryar yar guaxr dae middei mel zi box. <sup>18</sup> Jiasi zixl nael Lixlweixl su ca ddei arzzi-nimar mel gga Ziyila mermi ddei kebal hal peix leil guaxr su, Xinaxrdaxr ddei ssor Bawaryi zi box. <sup>19</sup> Jiasi zixl nael Mirsiba mermi leil guaxr su, Yisuyal ddei ssor zi box, zaxl-ddaexrddu zzaegu mel ji ggie xilmeirbbaer cirdae a, zzi weixrqiaxr ddei za xixl lei ggie zzezze ci. <sup>20</sup> Jiasi zixl nael Saxlbaexl ddei ssor Baluxl zabbar-seilseir a zi box, zzi weixrqiaxr ddei za xixl lei ggie cirdae a, Arbosobo leil zi su vaer zzir Yirlixlyalsixr hhexr alddur ggucirmi dax zzezze ci. <sup>21</sup> Hagesi ddei lilbol, Vulixlyal ddei ssor Mirlixlmoxl ar zixl zi box, Yirlixlyalsixr hhexr alddur ggucirmi dax cirdae a, Yirlixlyalsixr hhexr ddei zilele dax zzezze ci.

## Zzi Weixrqiaxr Zi Su Arbosobo Leil Zi Su Mel

<sup>22</sup> Jiasi zixl nael middei bbaelerler ggie goxr dae Arbosobo leil zi su mel zi box. <sup>23</sup> Bixlyarmir nei Hasuxl armael xi deixrgoxr hal zixl zi box. Jiasi zixl nael Yalnaxrnixr ddei lilbol, Marxiyar ddei ssor Yalsarlixlyar zi box, yar zi box ggie mel yar armael ddei xi dax naer dae. <sup>24</sup> Jiasi zixl nael Xinaxrdaxr ddei ssor Bixlneixl zi box, Yalsarlixlyar ddei xi dax cirdae a, zzi weixrqiaxr za xixl lei ggie dax ci, yoxl zzi giexrluxl dax zzezze ci. <sup>25</sup> Vusaexl ddei ssor Bala mel, zzi weixrqiaxr za xixl lei ggie deixrgoxr nei zzirmar hher ggie xi ggaxrsibbor zzir bol teixl lei dae taxr, alddur su su mel hher ggie zzaexggu dax naer dae hal zixl zi box. Jiasi zixl nael Baluxl ddei ssor Pirdaxlyar zi box a, <sup>26</sup> yilzi a ajjix gielmi ddei dofa piar a dax naer dae ggie ar maex nei Arbosobo ddei xi gga miar bei gger su mel goxr ggie Exrfeirlexl zzi dax zzezze zi box ci.

## Zibox Su Ca Kebal Halmel

<sup>27</sup> Jiasi zixl nael Tixrgeyal su ca mel zi box, bol teixl lei dae taxr vaervaer ddei deixrgoxr cirdae a, Exrfeirlexl ddei zzi weixrqiaxr

dax zzezze ci. <sup>28</sup> Mur gielmi dax cirdae a ggaxrsibbor ddeix<sup>b</sup> hal zixl, Arbosobo lei zi su mel armael ddei xi deixrgoxr zzi weixrqiaxr ddei zi box. <sup>29</sup> Jiasi zixl nael Yimaexl ddei ssor Sardu armael ddei xi deixrgoxr zi box. Jiasi zixl nael, dofa piar a gga gielmi ddei leil su su Sixljianixr ddei ssor Sixlmaryar zi box. <sup>30</sup> Jiasi zixl nael Sixllixl-miryar ddei ssor Hanaxrnixryar nei Saxlla ddei ssor qiuxller ddei, hherdder Hanexl zi box hal zixl nga a; Jiasi zixl nael Birlixljia ddei ssor Mirsulaxr armael ddei xi deixrgoxr zi box dae hal zixl nga a. <sup>31</sup> Jiasi zixl nael piu ddaexr su Marziyar zi box, Arbosobo ddei xi gga miar bei su ca nei vaexleixr bei su ca mel ddei xi dax zzezze zi box ci, Hamirfuxrjiaxr gielmi deixrgoxr, zzi giexrluxl taxr ddei dax zzezze ci. <sup>32</sup> Piu ddaexr su nei vaexleixr bei su mel zzi giexrluxl taxr ddei nei Ya gielmi ddei aga gga zi box.

Nixrximir Yar Miar Bei Dae Mel Leil Bbiur  
Gex Su Ca Mel Leil Bei Leixl Gger

**4** <sup>1</sup> Sebala ngua zzi weixrqiaxr zi box xixl dae ggie bbejjiur a dder sirzzi, seifu daxlgaxl faex, halae Yoxrdaxl su ca mel leil vaessi. <sup>2</sup> Yar, yar ddei arzzi-nimar nei Sarmarlixlyal su meixr mel meixsaer qir leil bbeix: “Cexr lei cexr nr ddo Yoxrdaxl su ca eilmel azo bei suax leir? Armael leil zzi weixrqiaxr ddei zi box xixl gger a ngo? Arbosobo leil zi a ngo? Cir ni dder zi box xixl jjia lol a ngo? Nilhar be gga adoxl cu goxr legelbbe mel sser a zi box xixl a ngo?” eine bbeix. <sup>3</sup> Yar dax hher dax dae Yalmae su ca Dobiryar bbeix: “Yaa zi box xixl zzi weixrqiaxr ddei, olddir a cir ddei ssi deix lei jjiux ze i gger xie,” eine bbeix. <sup>4</sup> Ngo Arbosobo dax ddar biar a bbeix: “Ngua ddei Arbosobo, yaa mel ngua leil i ze i; ni leil qiuxr, ngua ni dax qiuxr dae mel leil noni gger la, ni leil qiuxr, yaa bbeix vuxryixr dae mel yaa oldde leil ddeix lol la, yaa leil kebal mermi ssu si lol la. <sup>5</sup> Yaa mel zi box su ca mel leil seifu de, yel yaa ddei zuixl mel leil tor bbe nr gex, yaa ddei zuixl mel ni meixsaer qir leil tor ca pixl nr gger lol,” eine bbeix a.

---

<sup>b</sup>3:28 ggaxrsibbor ddeix Yilsi mel dder Baexrfa piar a gga.

<sup>6</sup> Yel ngua dder zzi weixrqiaxr ddei zi box a. Ca mel zabbar-seilseir a zi box a, zzi weixrqiaxr mel zzi dax zi zol gex du lei a; muggiebbaer cir peix zi du lei a.

<sup>7</sup> Sebala, Dobiryar, Alaboxr su ca, Yalmae su ca nei Yalsixrtu su ca mel, Yiluxlsaler zzi weixrqiaxr ddei zi box dae ho, xiaxr dae mel ddaexrcir du lei a bbejjiur a dder sirzzi. <sup>8</sup> Yaa cirke-lorbba cirgo a nr seir zzibbe a, Yiluxlsaler zzi ddei leil ddaexr lei a, zzi gga luaxl du lei lol niazzir. <sup>9</sup> Yel ngua dder ngua ddei Arbosobo dax ddar biar, yoxl ca leil miardal a su dae lol a, eilnirggu eilmerxixl lei yaa leil fa.

<sup>10</sup> Yoxrdaxl su ca mel bbeix: “Legelbbe zzeixr mel yarzisael miur, bil su ca mel wor-nr-ni ho a; yel ngua zzi weixrqiaxr ddei zi box nr cexr a.” <sup>11</sup> Ngua leil dir su ca mel bbeix: “Yaa nr saexl seir, nr mia seir car, niul yaa dax ddir a yaa leil seixl a, miar ddei bei nor lol,” eine bbeix. <sup>12</sup> Ngua leil dir su ca mel dax goxr naer su Yoxrdaxl su ca mel, hormo boxl nei lei a, ngua leil bbeix gger lei a bbeix: “Niul leil dir su ca mel cirpiar-hanga gga ddeix lei a, niul leil ddaexr lei var,” eine bbeix. <sup>13</sup> Yel ngo cassor-worssor mel leil jiacuxr dax zox dae a, altor, zzideilddu darsisi baex nei jirddaexrddu mel vei dae lol a, zzi weixrqiaxr giedae miax zzir ggie hher dae lol. <sup>14</sup> Ngo i za ssi ho a, ha du lei a cabessor mel leil, vaervaerpor mel leil nei kebal cassor-worssor mel leil bbeix: “Yaa leil gexr nr ssa, Seirpor mel vaer zzir halae idu ddo zzir ddei nga a holcir dae nia. Nia, nia ddei arzzi-nimar mel leil, nia ddei ssor mel leil, nia ddei ssormaer mel leil, nia ddei maerssor mel leil nei nia ddei ake mel leil weix a zaxlddaexr nia,” eine bbeix a.

<sup>15</sup> Ngua leil dir su mel ngua yaa bei niazzir dae mel leil saexl ho a bbejjiur, Arbosobo lei yaa bei niazzir dae mel bei nr cexr lol, yel yaa dder lei nr bel a. Ngua lei zzi weixrqiaxr dax halmaex jjixr ci a, armael bei labox miar ddei bei dae a. <sup>16</sup> Hal cir ni cirdae, ngo leil visser su ca cir peix a nael, miar bei; cir peix a nael, zzideilddu darsisi baex, zzi deil a pahher ddu, jirddaexrddu vei dae, halae zaxlddaexr a veixr ddu pia veixr dae. Vaervaerpor mel, Yoxrdaxl su cassor-worssor mel giedae ngier dae. <sup>17</sup> Zzi weixrqiaxr zi su ca mel nei sser labox bil su ca mel, leixrhher cir bbor a nael miar



bei, cir bbor a nael zzideilddu vei dae. <sup>18</sup> Zi su ca mel cirddei-hanga lei zzoxxbbeix leil armael ddei altor baex ddexr dae a zi. Cuxgexdaex mex su ddei nael, ngo dax hher dax dae. <sup>19</sup> Ngo cabessor mel leil, vaervaerpor mel leil nei kebal cassor-worssor mel leil bbeix: “Miar eil ddei yarzi vaer, zzi weixrqiaxr ddei lei yarzi si, niul zzi weixrqiaxr ddei leil hher dae a zzicarzzi dax yarzi giex vimir. <sup>20</sup> Nia cuxgexdaex ddei arddolmaex me ggie bbejjiur a mel dder, ngua dax halmaex gga hher pex du lei, niul ddei Arbosobo arsae bei lei niul leil zaxlddaexr gger,” eine bbeix a.

<sup>21</sup> Yel ngua dder miar bei a. Ca cir peix a merteir cirdae a gie ddux lei zzeze lei zzideilddu baex vei dae. <sup>22</sup> Halcar, ngo yoxl cassor-worssor mel leil bbeix: “Nia cirddei-hanga nei nia leil visser su mel Yiluxlsaler zzi ddei gga xixl dae nia. Eine nga a, ngua leil eilmerxixl su gger dae cexr, eilnirrgu miar bei gger cexr.” eine bbeix a. <sup>23</sup> Ngo nei ngo ddei arzzi-nimar, ngo leil visser su, halae ngo dax mae dae ngo ddei meixr mel lei pia lixr nr teixl, ajjix tir ssi a lei armael ddei zzideilddu ddei vei dae.

### Casolssor Mel Sol Biar

**5** <sup>1</sup> Capor mel nei yaa ddei maerssor mel worcixl-worni ae dae a, yaa ddei arzzi-nimar Yoxrdaxl su ca mel leil boxyox. <sup>2</sup> Yaa cir mel a nael bbeix: “Ngua nei ngua ddei ssormine mel yarzi miur, ngua leil loxlmoxr gger la, yel ngua gol dae cexr.” <sup>3</sup> Ca cir mel a nael bbeix: “Ngua mi, puxrto dae ggie nei xi mel yaxr ji dae a, meixr car loxlmoxr zzorddu zza lol.” <sup>4</sup> Ca cir mel a nael bbeix: “Ngua, ngua ddei mi nei puxrto dae ggie mel leil sser dae a, zzirbae cir a zzirmar leil suix sax gger a. <sup>5</sup> Ngua ddei ggecir mel nei ngua ddei arzzi-nimar ddei ggecir mel ciryoxr a nga. Ngua ddei ssormine mel yaa ddei ssormine mel dax ciryoxr a nga. Ngua zzael, armael ddei ssormine mel leil ddoddo-nrddo zebol mu ssi lol lalnga a; ngua ddei ssormaer mel zebol mu su ar mel zza a. Ngua ddei mi mel nei puxrto dae ggie mel si leil gger ho a; yel ngua azo bei bbesur nr zza.”

<sup>6</sup> Ngo yaa ae dae a bbeix dae ddar eil mel leil bbejjiur a dder yarzisael seifu faex. <sup>7</sup> Ngo nixmox zzar zabbar a xiar ho a dder, vaer-

vaerpor mel leil nei cabessor mel leil hie a bbeix: “Nia, nia ddei arzzi-nimar Yoxrdaxl su ca mel leil zzirbae cir gger a yaa dax lixl-sixr miurmiur li!” Yel ngo dder ca cirke leil ae pex du lei a yaa leil dir. <sup>8</sup> Ngo yaa leil bbeix: “Ngua arsae bei no kor bei a niul ddei arzzi-nimar, hherdder kebal mermi su mel leil vur gger Yoxrdaxl su ca mel leil vae xixl lei; nia halae arzzi-nimar mel leil vur a, ngua leil vae xixl lei lol niazzir a ngo?” Yaa dder arjjiuljjiu a hher dae a; ddarkoxlddu ddar nr zza a. <sup>9</sup> Yel ngo bbeix: “Nia bei dae mel nr seir! Nia azo bei lei niul ddei Arbosobo leil gexr nei i du nr ssa a ngo? Nrnga a, niul leil dir su Yoxrdaxl su nr nga ca hal mel niul leil bbeix vuxryixr leilei. <sup>10</sup> Ngo nei ngo ddei arzzi-nimar nei ngo leil visser su ca mel lei piu nei loxlmoxr mel cassor-worssor leil cir gger a. Niul cirke-lorbba lei yaa dax lixlsixr li nr ddo. <sup>11</sup> Ngo nia leil quex, yaa ddei mi, puxrto dae ggie, saercor dae ggie nei xi mel, halae yaa dax li si lei piu, loxlmoxr, puxrto zzibbaer yarsixl nei saercor ssuvi eil mel ddei lixlsixr mel yaa leil koxl gger nia.” <sup>12</sup> Ca mel bbeix: “Ngua arsae bei lei yaa leil koxl gger, zeixleixr yaa dax nr li a; arsae bei lei ni ddei ddar mel dax bei mae,” eine bbeix a. Yel ngo dder Arbosobo leil zi su mel leil ae si lei a, ca mel leil yaa bbeix dae mel sael a bei bbeix har zaxr lol. <sup>13</sup> Ngo lei pia xiux leil go dae a bbeix: “Nia bbeix dae mel bei nr ci arddeirnga a, Arbosobo leil nia leil go pixl gger lol a, nia ddei xi nei nia hazza leil su si a, nia leil cirza lei nr zza lol nia.” Yaa maelmaerjgia lei bbeix: “Amae!” Yaa Yihexrhuaxr leil bbeixzae gger, cassor-worssor mel lei yaa bbeix dae mel sael a bei ssi a.

### Nixrximir Azo Lei Nr Li

<sup>14</sup> Yaldaxrxuxi zzirmar ddei zzirmar bei nrzei koxl cirdae a, yar zzirmar bei socei nr koxl zzezze, hherdder ngo leil miardal a Yoxrdaxl su ca mel ddei serzar bei lol eil ceinir koxl gga, ngo nei ngo ddei arzzi-nimar mel zeixleixr lei serzar li wo mibbe loxlmoxr mel zzor nr goxr. <sup>15</sup> Ngo xilmeir leil serzar mel, ca mel leil (daxr ddei bil lir dax lol/fulda lir lol), bbe cir ni loxlmoxr nei zzibbaer, halae (piu zzirbae licei pir /piu ngorxiu kexl) li; yaa leil visser su mel lei cassor-worssor mel leil ci. Nael ngo Arbosobo leil gexr nei i du a ei-

ne nr bei. <sup>16</sup> Ngo mel zzi weixrqiaxr ddei leil lar zi box, mi nr vae, ngo leil visser su ca mel lei weixrqiaxr zi box dax dae. <sup>17</sup> Ngua zaza-lili cirgoxr-hanga gga lei Yoxrdaxl su ca mel leil cuxrteixl a, Yoxrdaxl su ca nei vaervaerpor maelmaer a cirxiu ngorceimo a ngo dax cirgo a almeixr zzor. <sup>18</sup> Cir ni loxrbbex ar ddei, ya paxldeildeil qiuxller bei har zaxr, yoxl yix cirke bei har zaxr, cei ni gga puxrto zzibbaer yarzi miur ar boxl geso. Eine nga bbeixarnar, cassor-worssor mel yarzi sulku, halae daxr ddei yarzi lir a, ngo serzar li wo mibbe mel nr gger lol. <sup>19</sup> Ngo ddei Arbosobo, ni leil qiuxr, ngo cassor-worssor eilmel leil weix a bei dae hazza leil holcir dae a, ngo leil seirseir meixl gger la.

### Nixrximir Leil Dir Dae Zuxryix Mel

**6** <sup>1</sup> Sebala, Dobiryar, Alaboxr su ca Zisaxl nei ngua leil dir su kebal ca hal mel, ngo zzi weixrqiaxr ddei ggu/zi box xixl jjia ho, eil mel gga xiaxr dae lei ar maex nr zza a bbejjiur a. (Halcar ngo halae gielmi alddur nr hha seir.) <sup>2</sup> Sebala nei Zisaxl dder ca leil miardal a ngo dax lei lol a bbeix: “Ni lei a, niul bbaelerlermo Anoxr mermi kax ar ddei gga zzi leil mia,” eine bbeix a. Ngazzael yaa ngo leil ke niazzir. <sup>3</sup> Yel ngo ca leil miardal a yaa leil bbeix gger ssi lol a bbeix: “Ngo mel miar vaer bei dae, ngo nia dax zeir nr cexr. Ngo arsae miar ddei nor a nia dax halmaex zeir cexr bbeixleir?” eine bbeix a. <sup>4</sup> Yaa ca mel leil eil mel sael a li boxl miardal si lei a ngo leil bbeix gger lei lol, ngo lei eil mel sael a yaa leil ddarkoxl. <sup>5</sup> Sebala eine sael a ngor boxl ddei yar leil visser su ddei leil miardal a, ngo leil i lei lol. Eil boxl mel leixrhher ddei gga ddaexr kae dae xil ar fo vei dae. <sup>6</sup> Xil gga vaexr dae a bbeix: “Cirgoxr-hanga gga biar dae, Zisaxl lei bbeix, ni nei Yoxrdaxl su ca mel zzirmar leil dir nia zzibbe, yel zzi weixrqiaxr ddei ggu box xixl; yaa halae bbeix, ni yaa ddei zzirmar bei niazzir. <sup>7</sup> Ni yoxl xiezi mel leil miardal a Yiluxlsaler zzi gga ni leil dor dae a ‘Yoxrdaxl mermi zzirmar zza a,’ eine bbeix zaxr lol. Eilcar, arsae bei lei ddar eil mel zzirmar dax biar ci var, yel ni leil qie, lei a ngua dax cirgo a zzibbe lei,” eine bbeix a. <sup>8</sup> Ngo dder ca leil miardal a yar leil ddarkoxl lol a bbeix: “Ni bbeix dae mel yarzi

nr nga, ni nrbba-nrbba bbeix teixl lei lalnga,” eine bbeix a. <sup>9</sup> Yaa ngua leil zux niazzir, yaa zzirdae a ngua gexr a leixrhher lei wor-nr-ni var, yel miar ddei dder bei teixl nr xie a. Nael Arbosobo, ni leil qiuxr, ngo leixrhher ddei leil worni lol la!

<sup>10</sup> Ngo Mirxidaxlbixr ddei lilbol, Dixllaexryar ddei ssor Sixlmaryar hhexr ake ssi ci a; halcar, yar alddur ddei ggabil dae a nr ddux. Yar bbeix: “Yaa ni leil seixl lei nia, hherdder eilmerxixl lei a ni leil seixl lei nia, yel niul Arbosobo ddei xi gga zzi leil mia a, alddur ggabil du lei nia.” <sup>11</sup> Nael ngo bbeix: “Ngo ca eil mel mel, holbbaexl pa var a ngo? Ngo ca eil mel mel, holbbaexl Arbosobo ddei xi gga ddir a olga ddei leil jiuxl cexr a ngo? Ngo nr ddir!” eine bbeix a. <sup>12</sup> Ngo Arbosobo yar leil miardal nr nga, yar armael ddei armael ddar eil mel bbeix a ngo leil dir, Dobiryar nei Sebala yar leil zzirbae gger a yar leil bbeix lol arddeir a i teixl lei a. <sup>13</sup> Yaa yar leil zzirbae gger a mel, ngo leil gexr lol a, ngo leil yar dax cirgo a zuixl bei lol a, ca mel ngo leil nrbba-nrbba biar cexr, ngo leil bbeix vuxryixr cexr. <sup>14</sup> “Ngo ddei Arbosobo, Dobiryar, Sebala, ssormaer xiezi Noxryaldir nei kebal xiezi mel ngo leil gexr lol niazzir, ni leil qiuxr, ni yaa bei dae mel leil holcir dae la.”

### Zzi Weixrqiaxr Ddei Zi Box Teixl A

<sup>15</sup> Yirluxl xiu nrzei ngor cir ni, zzi weixrqiaxr ddei zi box teixl a; maelmaer a ngorcei nr ni bei a. <sup>16</sup> Ngua leil dir su ca maelmaerjia nei ngua zaza-lili goxr dae kebal mermi su ca mel, miar eil ddei bei jjia a mel Arbosobo beijjiu a nga arddeir a saexl, yel yaa bbejjiur a dder qiaxrmeix zzi lei nr zza a. <sup>17</sup> Nixixl hal mel gga, Yoxrdaxl su cabessor mel zoxlzoxl a Dobiryar leil xil vaexr gger, Dobiryar lei yaa leil xil vaexr gger. <sup>18</sup> Dobiryar mel Yalla ddei ssor, Sixljianixr ddei mixlyixr a; halae yar ddei ssor Yuehanaxr mel, Birlixljia ddei ssor Mirsulaxr ddei ssormaer leil bbeix a yar maerssor bei lol, yel Yoxrdaxl su ca cirke a lei Dobiryar dax cir piar a bei. <sup>19</sup> Yaa zoxlzoxl a ngo meixsaer qir leil Dobiryar seirseir bei dae mel leil biar, halae ngo ddei ddar mel lei yar leil biar gger. Dobiryar yoxl zoxlzoxl a ngo leil xil vaexr gger a ngo leil gexr lol niazzir.

**7**<sup>1</sup> Zzi weixrqiaxr ddei zi box teixl car a, ngo zzi gielmi alddur mel lei hha teixl a; alddur su su, caxlgo caxl su nei Lixlweixl su ca mel leil lei miardal har ho a.<sup>2</sup> Ngo, ngo ddei arzzi-nimar Hanaxrnixr nei meixr hher ggie taxr ddei leil guaxr su vaervaerpor Hanaxrnixryar leil miardal a, Yiluxlsaler zzi ddei leil guaxr lol. Hanaxrnixryar mel koxlsseiddo, halae Arbosobo leil gexr nei i du su ca ar ddei a; arseir lei yar dax bir nr cexr.<sup>3</sup> Ngo yaa leil bbeix: “Merni ddux lei ho a saelnei Yiluxlsaler ddei zzi gielmi alddur mel ggapu ddo; Yiluxlsaler zzi gga su ca mel leil miardal a, armael miar bei zi ci car a, armael ddei xi deixrgoxr mel leil su dae lol nia; yaa halae su dae seir car dder zzi gielmi alddur mel ggabil du lei nia; nia zilzir la gex nia,” eine bbeix a.

#### Kebal Mermi Ssu Mal Si A Jjixr Lei Su Ca Mel Ddei Mi

<sup>4</sup> Zzi ddei zzael yarzi vaer, ca zzael yarzi nganiul, xi mel lei zi nr box seir.<sup>5</sup> Ngo ddei Arbosobo ngo leil nixmox zzar xiar du lei lol a, cabessor mel leil, vaervaerpor mel leil nei cassor-worssor mel leil ae pex du lei a, yaa ddei jiacuxr mel dax zox dae a hormo zza hhe zaxr lol. Ngo jjixr lei beil su ca mel ddei jiacuxr ddei mi vaexr deix dae mel leil zo wo a; eil mel leil vaexr deix dae mel jiasibbor mel nga a:

<sup>6</sup> Babirluixr goxrjia ddei zzirmar Nixrbuxljiaxrnixrsar halleix Yoxrdaxl mermi gga ssu si ca mel ddei giedae ca mel, yaa leil ssu mal si ggie cirdae a Yiluxlsaler nei Yoxrdaxl mermi armael ddei zzi gga jjixr a.<sup>7</sup> Yaa Sorloxbaboxr, Yisuyal, Nixrximir, Yalsarlixlyar, Lamir, Naxrhamarnixr, Moxldirgier, Bixlsa, Mirsipirlixl, Birgexrwaryi, Nixrhoxr nei Banaxr dax cirgo a jjixr lei.

<sup>8</sup> Yirsaexllixl su ca mel hormo zza jiasibbor vaexr dae: Baluxl giedae ca nrdu cirxiu sircei nnel (2,172).<sup>9</sup> Sixlfaxrtixryar ddei giedae ca soxiu sircei nnel (372).<sup>10</sup> Yalla ddei giedae ca qiuxlxiu ngorcei nnel (652).<sup>11</sup> Bahamoxrya ddei giedae ca , hherdder Yisuyal nei Yueya ddei giedae ca nrdu heixlxiu ceiheixller (2,818).<sup>12</sup> Yirlaxr ddei giedae ca cirdu nrxiu ngorcei liler (1,254).<sup>13</sup> Saxltur ddei giedae ca heixlxiu licei ngorler (845).<sup>14</sup> Saxlgier ddei giedae ca sir-

xiu qiuxlceimo (760). <sup>15</sup> Binexl ddei giedae ca qiuxlxiu licei heixl-  
 ler (648). <sup>16</sup> Birbaexl ddei giedae ca qiuxlxiu nrzei heixller (628).  
<sup>17</sup> Yajiaxr ddei giedae ca nrdu soxiu nrzei nnel (2,322). <sup>18</sup> Yaldo-  
 nixrga ddei giedae ca qiuxlxiu qiuxlcei sirler (667). <sup>19</sup> Birgexrwaryi  
 ddei giedae ca nrdu qiuxlcei sirler (2,067). <sup>20</sup> Yaldi ddei giedae ca  
 qiuxlxiu ngorcei ngorler (655). <sup>21</sup> Yaltexl ddei giedae ca, hherdder  
 Xisijia ddei giedae ca gecei heixller (98). <sup>22</sup> Hasuixl ddei giedae ca  
 soxiu nrzei heixller (328). <sup>23</sup> Birsaxl ddei giedae ca soxiu nrzei li-  
 ler (324). <sup>24</sup> Hala ddei giedae ca cirxiu ceinirmo (112). <sup>25</sup> Zibixl su  
 ca gecei ngorler (95). <sup>26</sup> Boxrlxlhexr su ca nei Nixrtoxfaxr su ca  
 maelmaer a cirxiu heixlcei heixller (188). <sup>27</sup> Yalnaxrtu su ca cir-  
 xiu nrzei heixller (128). <sup>28</sup> Boxr-Yalsimarfuxr su ca licei nnel (42).  
<sup>29</sup> Zilixlyilixr su ca, Zifeila su ca, Birluxl su ca maelmaer a sirxiu licei  
 soler (743). <sup>30</sup> Lamar su ca nei Jiaba su ca maelmaer a qiuxlxiu nrzei  
 cirdder (621). <sup>31</sup> Moxlmar su ca cirxiu nrzei nnel (122). <sup>32</sup> Boxr-  
 texllixl su ca nei Aexl su ca maelmaer a cirxiu nrzei soler (123).  
<sup>33</sup> Kebal Nixrbo su ca ngorcei nnel (52). <sup>34</sup> Kebal Yirlaxr ddei gie-  
 dae ca cirdu nrxiu ngorcei liler (1,254). <sup>35</sup> Halixr ddei giedae ca so-  
 xiu nrzeimo (320). <sup>36</sup> Yilixlge su ca soxiu licei ngorler (345). <sup>37</sup> Loxr-  
 daexr su ca, Hadixl su ca nei Anoxr su ca maelmaer a sirxiu nrzei  
 cirdder (721). <sup>38</sup> Xinaxr su ca sodu gexiu soceimo (3,930).

<sup>39</sup> Arbosobo leil zi su: Yisuyal hhexr, Yidaxlyar ddei giedae ca  
 gexiu sircei soler (973). <sup>40</sup> Yimaexl ddei giedae ca cirdu ngorcei  
 nnel (1,052). <sup>41</sup> Basihuxl'aer ddei giedae ca cirdu nrxiu licei sir-  
 ler (1,247). <sup>42</sup> Halixr ddei giedae ca cirdu ceisirler (1,017).

<sup>43</sup> Lixlweixl su ca: Hexrdaxrwei ddei giedae ca, hherdder Yisuyal  
 nei Jiaxrmixl ddei giedae ca sircei liler (74). <sup>44</sup> Caxlgo caxl su: Yal-  
 saxl ddei giedae ca cirxiu licei heixller (148). <sup>45</sup> Alddur su su: Sa-  
 loxr ddei giedae ca, Yaltexl ddei giedae ca, Daxrmae ddei giedae  
 ca, Yalgur ddei giedae ca, Hadirdaxl ddei giedae ca nei Soxlbaexl  
 ddei giedae ca, maelmaer a cirxiu socei heixller (138).

<sup>46</sup> Nixrtixrnixr (hherdder Arbosobo ddei xi gga miar bei su ca): Xi-  
 ha ddei giedae ca, Hasuba ddei giedae ca, Daxrba'er ddei giedae  
 ca, <sup>47</sup> Ziluxl ddei giedae ca, Xiyal ddei giedae ca, Baduixl ddei gie-

dae ca, <sup>48</sup> Lixlbanaxr ddei giedae ca, Hajiaba ddei giedae ca, Saxlmaer ddei giedae ca, <sup>49</sup> Hanaxl ddei giedae ca, Jixrdaexr ddei giedae ca, Jiaha ddei giedae ca, <sup>50</sup> Lixlyalyar ddei giedae ca, Lixlxuxl ddei giedae ca, Nixrgedaxl ddei giedae ca, <sup>51</sup> Jiasaxl ddei giedae ca, Wusar ddei giedae ca, Baxiyal ddei giedae ca, <sup>52</sup> Birsaxl ddei giedae ca, Mirwunir ddei giedae ca, Nixrpurxi ddei giedae ca, <sup>53</sup> Bapur ddei giedae ca, Hagurba ddei giedae ca, Hahu ddei giedae ca, <sup>54</sup> Baxirlixl ddei giedae ca, Mirxidaxl ddei giedae ca, Hasa ddei giedae ca, <sup>55</sup> Bake ddei giedae ca, Xixila ddei giedae ca, Daxrmar ddei giedae ca, <sup>56</sup> Nixrxixlyal ddei giedae ca, Hatixrfaxr ddei giedae ca.

<sup>57</sup> Sorloxmexr leil miar bei gger su ca mel ddei giedae ca, hherdder Sortaexl ddei giedae ca, Sorfeilixl ddei giedae ca, Birluxldaxl ddei giedae ca, <sup>58</sup> Yarla ddei giedae ca, Daxrkui ddei giedae ca, Jixrdaexr ddei giedae ca, <sup>59</sup> Sixlfaxrtixryar ddei giedae ca, Hatixl ddei giedae ca, Boheilixl-Hasibayi ddei giedae ca, Yalmae ddei giedae ca.

<sup>60</sup> Nixrtixrnixr (hherdder Arbosobo ddei xi gga miar bei su ca) nei Sorloxmexr leil miar bei gger su ca mel ddei giedae ca mel maelmaer a soxiu gecei nnel (392).

<sup>61</sup> Texlmirla, Texlhasaxl, Ziluxl, Yalduixl nei Yimaexl zzi gga ddeix lei su mel, yaa ddei porpor mel Yirsaexllixl su ca nga nga nr saexl. <sup>62</sup> Yaa mel Dixllaexryar ddei giedae ca, Dobiryar ddei giedae ca, Nixrgedaxl ddei giedae ca mel nga a; maelmaer a qiuxlxixu licei nnel (642).

<sup>63-64</sup> Arbosobo leil zi su mel gga, Habayar ddei giedae ca, Hagesi ddei giedae ca nei Baxilaexr ddei giedae ca mel, porpor mel gga armael ddei porpor leil zo wo nr ddo a, yaa leil dder sei-nr-beix suax, yel yaa Arbosobo leil zi su bei nr cexr. Baxilaexr ddei giedae ca ddei porpor ddei Zilixl su ca Baxilaexr ddei ssormaer leil bbeix a maerssor bei lol, yel yar leil dder Baxilaexr mi. <sup>65</sup> Serzar ddei yaa leil bbeix: “Arbosobo leil zi dae mel zzor nr ddo, Wulixr nei Turmixr sser su Arbosobo leil zi su zza hane zzeze ci nia.”

<sup>66</sup> Yoxrdaxl mermi jjixr ci su ca maelmaerjjia a limeir nrdu soxiu qiuxlceimo (42,360) zza. <sup>67</sup> Eilmel leil cuxrteixl a, halae yaa leil miar

bei gger su sirdu soxiu socei sirlar (7,337) zza, yoxl caxlgo caxl su capor ssormaer nrxiu licei ngorler (245) zza. <sup>68</sup> Yaa mur sirxiu socei qiuxller (736) zza, lozi nrxiu licei ngorler (245) zza, <sup>69</sup> Loxltoxr lixiu socei ngorler (435) zza, tarlodaex qiuxldu sirxiu nrzeimo (6,720) zza.

<sup>70</sup> Hormo cuxr ddei vaervaerpor mel Arbosobo ddei zzi weixrqiaxr ddei zi box a cirza-hanga ju. Serzar mel ju dae mel: sae heixl zi, baxlaxr ngorcei (50) peixl, Arbosobo leil zi su mel veixr labox pia ngorxiu socei (530) xiux. <sup>71</sup> Cuxr mel ddei vaervaerpor mel sae cirxiu qiuxlcei heixl (168) zi, piu cirdu nrxiu ngorcei (1,250) zi. <sup>72</sup> Kebab cassor-worssor mel sae cirxiu qiuxlcei heixl (168) zi, piu cirdu cirxiu licei (1,140) zi nei Arbosobo leil zi su mel veixr labox pia qiuxlcei sir (67) xiux ju.

<sup>73</sup> Yel Arbosobo leil zi su, Lixlweixl su ca, alddur su su, caxlgo caxl su, cassor-worssor cirke, Nixrtixrnixr (hherdder Arbosobo ddei xi gga miar bei su ca) nei Yirsaexllixl su ca maelmaerjjia armael ddei zzi ddei gga goxr dae a.

### Yirsila Cassor-Worssor Mel Leil Lixlfaxr Zza Gger

**8** <sup>1</sup> Yisaexllixl su ca maelmaerjjia Yiluxlsaler zzi gga ajjix gielmi alddur (xilmeirbbaer/dax) kuax ggie hher pex du lei a. Yaa Arbosobo ddei sul saexl su Yirsila leil Lixlfaxr sul jur vei si lei lol, Lixlfaxr su eil jur mel Yihexrhuaxr Moxrxi leil sser dae a Yirsaexllixl su ca mel leil vaexr gger jur nga a. <sup>2</sup> Sir xiu ddeixteixl cir ni, Arbosobo leil zi su Yirsila Lixlfaxr sul jur, noni ho a saexl var capor ssormaer mel meixsaer qir leil vei mal ci a. <sup>3</sup> Ajjix gielmi alddur (xilmeirbbaer/dax) kuax ggie, eilneixr-nehe cirdae a zzocir zzor zi ci zzeze, noni ho a saexl var capor ssormaer maelmaerjjia meixsaer qir leil, Lixlfaxr sul eil jur zza. Ca maelmaerjjia lei seilseir a noni dae. <sup>4</sup> Arbosobo ddei sul saexl su Yirsila mel eilboxl leil weix a bei six taexrtaexr ddei leil ngier dae. Martatixryar, Sixlmar, Yalnaexlyar, Wulixlyal, Xilexljia nei Marxiyar nael, yar yo piar a gga ngier dae; Birdaxlyar, Mirsalixl, Marziyar, Hasuixl, Habaxrdaxlnaxr, Sarjialixlyal nei Mirsulaxr nael, yar vael piar a gga ngier dae.



<sup>5</sup> Yirsila taexrtaexr darmumu ddei leil ngier dae a, cassor-worssor maelmaerjjia yar leil i dae. Yar sul eil jur ddaexr kae a qie, cassor-worssor mel dder ngier du lei a. <sup>6</sup> Yirsila vaer zzir Arbosobo Yihexrhuaxr leil bbeixzae gger; ca maelmaerjjia lei leixrhher ddei bil du lei ddarkoxl a bbeix: “Amae! Amae!” Yaa olmer dae a, qiaxr-meix ddei middur leil puxr gex dae a, Yihexrhuaxr leil bbeixzae gger. <sup>7</sup> Lixlweixl su ca Yisuyal, Banixr, Sixllixlbir, Yarmir, Yalgur, Sabirtaexl, Hexrdixlyar, Marxiyar, Zilixlta, Yalsarlixlyar, Yuesar-baxr, Hanaxl nei Pirlaexryar cassor-worssor mel leil Lixlfixr saexl lol; cassor-worssor mel armael ngier ggie hher dae. <sup>8</sup> Yaa zabbar-seilseir a Arbosobo ddei Lixlfixr sul jur zza, yoxl azo yilsi a biar, cassor-worssor mel dder zza dae hazza azo yilsi a saexl a.

<sup>9</sup> Cassor-worssor mel Lixlfixr sul jur gga ddar mel leil bbejjiur a, maelmaerjjia lei nge dae a; yel Serzar Nixrximir nei Arbosobo leil zi su Arbosobo ddei sul saexl su Yirsila, halae cassor-worssor mel leil mul gger su Lixlweixl su ca mel cassor-worssor mel leil bbeix: “Eilni mel nia ddei Arbosobo Yihexrhuaxr kebal nixixl mel dax bbe teixl lei nixixl a; yel nia cix nr ddo, nge lei nge nr ddo,” eine bbeix a. <sup>10</sup> Nixrximir yoxl yaa leil bbeix: “Eilni mel niul ddei Arbosobo kebal nixixl mel dax bbe teixl lei nixixl a; nia zzorci ddo ddo mel zzor ssi, dda ci ddo ddo mel dda ssi, halae ar mel vei teixl lei a bei har zaxr ddu nr zza su ca mel leil bbe gger. Yihexrhuaxr (leil koxl dae a li wo ggesese mel mel, nia leil warni lol su mel nga a;/dax lei ggesese ddu mel mel, nia leil warni lol su mel nga a;) yel nia cix nr ssa,” eine bbeix a. <sup>11</sup> Yel Lixlweixl su ca mel cassor-worssor mel leil arjjiuljjiu a hher dae lol a bbeix: “Eilni mel Arbosobo kebal nixixl mel dax bbe teixl lei nixixl a; yel arjjiuljjiu a hher dae nia, cix nr ssa,” eine bbeix a. <sup>12</sup> Cassor-worssor mel mel yaa leil mul gger dae ddar mel leil saexl a; yel dder ggegge-sese a zzorzzor-ddadda, halae kebal ca mel leil bbe gger.

### Zuxlpoxr Jiax /Zaxlpoxr Jiax/Xigex Jiax

<sup>13</sup> Giedae cir ni, cassor-worssor mel ddei circuxr-hanga ddei vaer-vaerpor mel, Arbosobo leil zi su mel nei Lixlweixl su ca mel cirgo a

Arbosobo ddei sul saexl su Yirsila dax halmaex ssi ci a, zabbar-seilseir a Arbosobo ddei Lixlfaxr sul jur gga ddar mel leil zza lei. <sup>14</sup> Yaa, Yihexrhuaxr Moxrxi leil sser dae a miardal dae Lixlfaxr sul jur leil vaexr dae ggie mia a bbeix: Yirsaexllixl su ca mel sir xiu gga jiax ddei goxr a mel, xigex gga goxr nia. <sup>15</sup> Halae zzi cirddei-hanga gga nei Yiluxlsaler zzi ddei gga eine bbeix gger a bbeix: “Nia ddux a wordabor ssi a, saercor zzei, saercor yir zzei, fasixrliur zzei, jji zzei nei ciryoxr-hanga yarzi vax sixzzei yarbaxlleixr mel taexl si lei a, lixlfaxr sul leil vaexr dae mel dax zox dae a xigex daxr,” eine bbeix gger nia. <sup>16</sup> Yel cassor-worssor mel dder ddux a, yarbaxlleixr mel taexl si lei a, ca cirddei-hanga armael ddei xi ddei ol-lele leil, bbeixsael armael ddei zzaexggu gga, bbeixsael Arbosobo ddei xi zzaexggu gga, bbeixsael ajjix gielmi alddur dax kuax ggie, bbeixsael Yirfarlixr gielmi alddur dax kuax ggie xigex daxr. <sup>17</sup> Ke-bal mermi ssu mal a jjixr lei su ca maelmaerjjia dder xigex daxr a, xigex gga goxr dae a. Nexl ddei ssor Yuesuyal dax cirdae a eilni zzeze ci a lei, Yirsaexllixl su ca mel eil mel sael a bei nr seix. Yel cassor-worssor mel dder yarzisael ggese. <sup>18</sup> Goxr beil cir ni cirdae a maelele cir ni zzeze, Yirsila bbecir-bbeni Arbosobo ddei Lixlfaxr sul jur zza. Yaa jiax sir ni goxr a; heixl ni cir ni nael, leiddur ddei dax zox dae a, cirgo a hher pex dae a jiax goxr jjia (cir ni /nixixl) goxr.

### Yirsaexllixl Su Ca Mel Yaa Ddei Zuixl Mel Leil Cexrssexl

**9** <sup>1</sup> Eil xiu gga nrzei li cir ni, Yirsaexllixl su ca mel cirgo a hher pex du lei a, cirgo a almeixr lei nr zzor Arbosobo dax ddar biar, ggecir leil zzir pia veixr, oldde leil nilme xiu deix. <sup>2</sup> Yirsaexllixl su ca mel kebal su ca mel dax bbe kae. Yaa ngie dae a, armael ddei zuixl nei porpor mel bei cox dae mel cexrssexl. <sup>3</sup> yaa sagoxl xiarsixr nael ngier dae a Arbosobo ddei lixlfaxr mel zza, sagoxl xiarsixr nael zuixl cexrssexl nei yaa ddei Arbosobo Yihexrhuaxr leil bbeixzae gger. <sup>4</sup> Lixlweixl su ca Yisuyal, Banixr, Jiaxrmixl, Sixlbanixr, Buxlnixr, Sixllixlbir, Banixr nei Zinaxrnixr taexrtaexr ddei leil ngier dae a bbialil-bbialor yaa ddei Arbosobo Yihexrhuaxr leil qiuxr. <sup>5</sup> Lixl-

weixl su ca Yisuyal, Jiaxrmixl, Banixr, Hasanixr, Sixllixlbir, Hexr-dixlyar, Sixlbanixr, Pirtaxiyar bbeix: “Nia ha du lei a nia ddei Arbosobo Yihexrhuaxr leil bbeixzae gger nia, arddolcar ci a lei bbeixzae gger nia! Yihexrhuaxr, ni yarzi middux mi ddei leil mel bbeixzae gger mibbe, caxlzae gger dae nei bbeixzae gger dae hazza leil lei vaer leixl,” eine bbeix a.

### Arbosobo Dax Zuixl Cexrssexl

<sup>6</sup> “Ni larni Yihexrhuaxr a! Ni merlabbor, merlabbor ddei merlabbor nei merlabbor ddei cirza-hanga, halae middurbbor nei middurbbor ddei cirza-hanga, neixvi nei neixvi gga cirza-hanga mel leil cox a; ni halae yaa leil olga zza lol. Merlabbor ddei meixr mel lei ni leil bbeixzae gger. <sup>7</sup> Ni mel Arbosobo Yihexrhuaxr a; ni Yalboxrlaxr leil tiur, ni yar leil Jialexldir mermi Wur'er gga hier teixl lei, yoxl yar leil Yalboxrlahar mi box gger. <sup>8</sup> Ni mel, yar ni meixsaer qir leil nixmox zzar yarjjar nr zza saexl, yel dder yar dax, Jianaxr su ca, Hexl su ca, Yalmoxrlixl su ca, Birlixlxir su ca, Yibuxlsi su ca nei Gexrjiasar su ca mel ddei middei mel yar giedae ca mel leil gger bbeix har zaxr a. Ni (mel yarzi seir/leil mel ddarzziddo/leil mel koxlsseiddo), yel ni, ni bbeix dae mel sael bei a.

<sup>9</sup> Ni halleix ngua ddei porpor mel Aezixr goxrjia gga goxrsolgoxrnaxr dae mel leil mia, ni yaa neixvi nilni bbe dax ni leil qiuxr dae mel leil noni a dder, <sup>10</sup> faxrlar leil nei yar woxrke vaervaerpor mel leil, halae yar ddei goxrjia ddei gga ca mel leil ddoddomo murgurmo bei. Ni mel yaa Yirsaexllixl su ca mel dax yarzi olvaer bei saexl, yel ni eilni zzeze ci a lei armael ddei mi ddei leil middux lol. <sup>11</sup> Ni yoxl ngua porpor mel meixsaer qir leil neixvi bbe bbe kae a, yaa leil neixvi bbe gga hieltebbor ssi lol, ni yaa leil ggaxrmae lei su ca mel leil ajjix darneixlneixl gga piar ji gger, hherdder legelbbe mel leil ajjix vaervaer mel gga piar ji gger mel sael a nga. <sup>12</sup> Halae eilnir-ggu nael, zico sseigu sser a yaa leil hier dae; eilmerxixl nael, adoxl sseigu sser a yaa ssi dae jjiumo zex leil bbele lol. <sup>13</sup> Ni Xinaer worga leil ze ci, ni merlabbor gga cirdae a yaa dax ddar biar a, yaa leil bbaehhexhhexmo miardal dae mel, ddarzziddoddomo Lixlfaxr mel,

halae yarzi seir mul gger dae mel nei bei ddo bei nr ddo mel biar gger. <sup>14</sup> ni yoxl yaa leil ni ddei (seirceix-seirmaer/kebal nixixl mel dax bbe teixl lei) wornol nixixl cirni saexl lol, ni leil visser su Moxrxi leil sser dae a yaa leil bei ddo bei nr ddo, leiddur nei Lixlfaxr gger. <sup>15</sup> Yaa meixr car, ni merlabbor zzorddu zei lei lol a yaa leil zzor lol; yaa sixl car, ni legelbbe vaervaer taex gga ajjix ddux lei lol a yaa leil dda lol. Ni yaa leil miarda a, ni yaa leil gger bbeixharzaxr dae middei ddei (gga ddir/li ssi) lol.

<sup>16</sup> "Nael ngua ddei porpor mel (ho bei ho olvaer, ho bei ho nixmox gex, ni bei ddo bei nr ddo miardal dae mel dax bei nr mae/azo bei lei yarzi olvaer, qux lei qux dil nr ddo, ni miardal dae mel leil lei nonr-ni); <sup>17</sup> yaa noni nr yux, halae ni yaa dax murgurgurmo ddoddomo bei dae mel leil hol-nr-cir, quxwu lei nr no, armael ddei armael vaervaerpor tiur a, yaa zebol mu goxr ggie jjixr niazzir. Nael ni mel ca leil ssoxrsuxl yux, ca leil seirseir meixl gger, ca leil zoxlnixr, seifu faex nr so, halae ca mel leil daxlgaxl-daxllixl perniar Arboso-bo ddei nga a; ni yaa leil piarpixl nr gger. <sup>18</sup> Yaa niur bbex ar ddei bei a, zzicarzzi dax ' Eilddei mel ni leil Aezixr mermi hier teixl lei su ddei nga a' eine bbeix a, ni leil daxlgaxl-daxllixl seifu faex lol bbeix arnar, <sup>19</sup> ni halae yaa leil yarzi sael zoxlnixr, hierbolpae gga yaa leil piar pixl nr gger. Eilnirggu, zico sseigu taex yaa dax bbe nr kae, yilzi a yaa leil hier dae a jjiumo ssi; eilmerxixl, adoxl sseigu taex lei yaa dax bbe nr kae, yilzi a yaa ssi labox jjiumo zex leil bbele lol. <sup>20</sup> Ni lei ni ddei yarzi seir xiu ddei yaa leil mulgger lol; ni yaa leil Marnaxr zol, yoxl yaa leil ajjix da. <sup>21</sup> Hierbolpae gga (hher dae/ssi za dae) eil licei koxl gga, ni yaa leil gu dae a, yaa dder cirza lei nr quxr; pia mel veixr nr ddu, qihher mel lei nr pexl. <sup>22</sup> Ni yaa leil cirgoxr-hanga leil ddaexr leixl gger lol, yaa dax goxr naer dae middei mel li wo lol. Yaa Xisixrber zzirmar Xihoxr nei Basa zzirmar Exl ddei middei mel liwo. <sup>23</sup> Ni yaa giedae ca mel leil merlabbor ddei gie mel sael a be lol, ni yaa leil hier dae a, ni yaa ddei porpor mel leil gger bbeix har zaxr dae middei ddei gga ddir. <sup>24</sup> Yaa giedae ca mel ddir a middei halddei li wo a; ni yaa meixsaerqir leil halmaex gga Jianaxr su ca mel leil bei leixl gger a, Jianaxr mermi zzirmar

mel nei halmaex gga ca mel yaa leixrga gga jia ji gger a, yaa ar-sae bei niazzir arsae bei lol. <sup>25</sup> Yaa (velvermo/naxrcixlcixlmo) zzi mel, naxrcixlcixlmo mi mel, zzaegu naxrcixlcixl mel dol ji bbi dae xi mel, giexl har dae lurddur mel, puxrto dae ggie, saercor dae ggie nei cirza-hanga saerzzei mel (li wo/su si lei ) a. Yaa dder zzor a zzor bbox a, ggecir ddei lei paxldeildeil mo, ni ca mel leil yarzi sael perniar a, yaa nixmox zzar yarzi sael ggesse.

<sup>26</sup> Nael, yaa mel ni ddei ddar nr no, ni leil dir, ni ddei lixlfaxr mel dax bei nr mae, yaa leil ni dax jjixr lei nia qux su xiezi mel leil seixlzil gger, ni leil daxlgaxl-daxllixl seifu faex lol. <sup>27</sup> Yel ni yaa leil, yaa leil gguxci su yaa leil dir su ca mel leixrga gga jia ji gger. Yaa goxrsol-goxnaxr car a ni leil qiuxr a, ni dder merlabbor hher dae a yaa qiuxr dae mel leil noni, ni ca leil yarzi sael zoxlnixr mel dax zox dae a yaa leil jiuxl su gger a, yaa leil yaa leil dir su ca mel leixrga gga jiuxl teixl lei a. <sup>28</sup> Nael yaa zzasoso a nixixl goxr cexr ho a, yoxl ni meixsaerqir leil nr seir mel bei, yel ni yaa leil, yaa leil dir su ca mel leixrga gga piar ji gger a, yaa leil dir su mel yaa leil guaxr gex dae lol. Nael yaa za xixl lei a ni leil qiuxr, ni hahae merlabbor hher dae a yaa qiuxr dae mel leil noni, cirboxl-cirboxl ni ca leil zoxlnixr mel dax zox dae a yaa leil jiuxl. <sup>29</sup> Ni yaa leil larhorhormo bbeix a ni ddei lixlfaxr dax bei mae dae lol, nael yaa yarzzir-yarleixr bei, ni miardal dae mel leil no-nr-ni, ni mulgger dae mel leil dir(ca mel bei mae dae arddeirnga a dder arae bei lei gol dae var), nael yaa ni lei nr li, qux wu nr ssi, ddar no nr yux. <sup>30</sup> Ni yaa dax hormo koxl nei sser gel lei a; yoxl ni ddei xiu ddei xiezi mel leil sser dae a yaa leil qux, yaa halae no-nr-ni, yel ni yaa leil cirgoxr-hanga ca mel ddei leixrga gga jia ji gger. <sup>31</sup> Ni mel ca leil seirseir meixl gger, ca leil zoxlnixr su Arbosobo ddei nga a; yel eine nga a bbeix arnar, ni yaa leil zoxlnixr a, yaa leil bei zil jjia nr gger, yaa leil lei piarpixl nr gger.

<sup>32</sup> Ngua ddei Arbosobo, ni mel vaer zzir, ddo zzir, idu ddo zzir, bbeix har zaxr dae mel bei ci nei ca leil perniar su Arbosobo ddei nga a. Ni leil qiuxr, ngua ddei zzirmar mel, vaervaerpor mel, ni leil zi su mel, xiezi mel, porpor mel nei ni ddei cassor-worssor mel, Yal-suxl zzirmar mel dax cirdae a eilni zzezze goxrsol-goxrnaxr pex dae

mel leil tor i ye nr gger. <sup>33</sup> Ni ngua leil faxr a mel faxr mibbe; ni leil mel ddarzziddo, ngua zzael zuixl bei a. <sup>34</sup> Ngua ddei zzirmar mel, vaervaerpor mel, ni leil zi su mel nei porpor mel lei ni ddei lixfaxr ddei dax bei nr mae, ni azo bei ddo azo bei nr ddo miardal dae mel leil no-nr-ni, halae ni yaa leil larhorhor mo bbeix dae mel leil lei no-nr-ni. <sup>35</sup> Yaa armael ddei goxrjia ddei gga, hherdder ni yaa leil gger naxrcixlcixl mo middei eilddei gga hher dae a, ni yaa leil daxlgaxl-daxllixl seirseir meixl gger dae mel gga goxr ji dae bbeix arnar, halae ni leil vi-nr-sser, yaa nr seir bei dae mel dax bbe nr kae. <sup>36</sup> Eilcar ngua zebol mu dae a; ni ngua porpor mel leil gger dae middei mel gga, ni ngua ddei porpor mel leil eilmaex gga dae teixl lei cirza-hanga zzorci ddo zzor lol middei ddei gga, ngua zebol loxr a. <sup>37</sup> Middei eilddei gga dae teixl lei cirke lei cirgoxr-hanga ddei zzimar mel ddei loxr a; hherdder ngua zuixl bei a ni miardal si lei a ngua leil guaxr dae lol mel nga a. Yaa arsae bei niazzer bei a, ngua nei ngua ddei zzeir mel leil guaxr gex dae. Ngua daxlgaxl-daxllixl goxr sol dae," eine bbeix a.

<sup>38</sup> Eilmel leil weix a, ngua zabbar seilseir a bbeix har zaxr a, sul leil vaexr zei lei a; ngua ddei vaervaerpor mel, Lixlweixl su ca mel nei Arbosobo leil zi su mel leil sul eil ddei leil mi vaexr deix a.